



## Perjanjian konsesi air wajar dibatal

Piarapakaran S | Mei 4, 11 11:57am

Pihak Persatuan Penyelidikan Air dan Tenaga Malaysia (AWER) telah menghasilkan laporan mengenai penstruktur semula industri perkhidmatan air di Malaysia.

Laporan ini menggariskan intipati Akta Perkhidmatan Industri Air 2006 (WSIA). AWER juga mengemukakan tiga kajian kes. Salah satu kajian kes adalah mengenai konflik penstruktur semula industri air di Selangor.

Terdapat beberapa artikel pendapat dalam akhbar tempatan yang menyentuh isu perjanjian konsesi yang merupakan salah satu topik yang dilaporkan.

Saya ingin menjemput semua lapisan masyarakat khususnya rakyat Selangor untuk membaca laporan penuh mengenai penstruktur semula industri air negara di laman web AWER ([www.awer.org.my](http://www.awer.org.my)) supaya dapat memahami sepenuhnya cadangan-cadangan kami.



Kajian pihak AWER adalah menyeluruh dan terperinci. Laporan kami telah menyentuh aspek menyeluruh dan impaknya kepada rakyat.

Melalui WSIA, kerajaan persekutuan akan menstruktur semula industri perkhidmatan air supaya semua operator air dilesenkan dan beroperasi dalam keadaan 'ringan-aset'.

Syarikat air S'gor kompetitif

Ini bermakna aset berliabiliti (hutang) daripada operator air akan dipindahkan kepada Pengurusan Aset Air Berhad (PAAB), sebuah unit khas Kerajaan Persekutuan.

Ini juga bermakna semua operator air hanya perlu fokus kepada membekalkan air secara berterusan dan berkualiti.



Bagi pengetahuan semua, penstruktur semula industri air negara sepatutnya selesai menjelang akhir tahun 2010 mengikut Rancangan Malaysia ke-9. Ini adalah rancangan Kerajaan Persekutuan, bukannya AWER.

AWER lebih risau mengenai kos kelewatan penstruktur semula dan impaknya kepada rakyat dari segi tarif serta kelewatan penambahbaikan infrastruktur perkhidmatan air secara keseluruhan.

Pihak AWER ingin menegaskan bahawa kaedah operasi menggunakan perjanjian konsesi adalah tidak sesuai dan ramai yang percaya akan kebolehan syarikat-syarikat

Perjanjian konsesi air wajar dibatalkan

air di Selangor.

Memandangkan syarikat-syarikat air di Selangor berkaliber dan kompetitif, maka ia tidak akan menimbulkan sebarang masalah jika mereka beroperasi mengikut kaedah pelesenan yang termaktub dalam WSIA.

Minimumkan kenaikan tarif

Laporan AWER tidak mengatakan bahawa tarif air tidak akan meningkat tetapi kenaikan tarif air dapat diminimumkan melalui pelaksanaan WSIA.

Pihak AWER juga telah menyatakan bahawa kos-kos yang terlibat dalam penetapan tarif akan diaudit dan rakyat perlu terlibat sama dalam proses penetapan tarif. Ini adalah intipati yang termaktub dalam pelaksanaan WSIA.

Menteri Tenaga, Teknologi Hijau dan Air, Datuk Seri Peter Chin Fah Kui juga telah menyatakan dalam laman blognya, bahawa kenaikan tarif mengikut model WSIA di Selangor adalah di antara 10 hingga 15 peratus berbanding dengan perjanjian konsesi yang mencecah 37 peratus.

AWER berpendapat bahawa cadangan kerajaan persekutuan untuk menstruktur semula industri perkhidmatan air sebenarnya membawa lebih banyak manfaat kepada rakyat berbanding kemudaratian yang digambarkan oleh penulis-penulis berkennaan.

Air adalah isu keselamatan negara. Semua lapisan rakyat berhak untuk mendapat bekalan air secara berterusan dan berkualiti dengan tarif yang berpatutan.

Memandangkan pelaksanaan WSIA dapat meminimumkan kenaikan tarif air, maka adalah wajar perjanjian konsesi dibatalkan mengikut model WSIA demi melindungi kepentingan rakyat.

*Piarapakan S adalah presiden Persatuan Penyelidikan Air dan Tenaga Malaysia (AWER). Tulisan ini merupakan pandangan peribadi beliau dan tidak semestinya menggambarkan pendirian Malaysiakini.*

